

Ismaaeel^(a.s) Kī Paidaaish

Taurait : Khilqat 16:1-16

Saarah Ibraaheem^(a.s) kī beewī theen, aur bahut saalon ke baad bhī unse koī aulaad paidā naheen huī. Saaraah ke paas ek Misrī naukraanī thī jiskā naam Haajirā thā.⁽¹⁾ Saarah ne Ibraaheem^(a.s) se kahā, “Allaah taa’alā ne mujhe aulaad naheen dī hai to merī naukraanī se shaadī kar leejie. Ho saktā hai ki usse hameñ koī aulaad haasil ho jaae.” Ibraaheem^(a.s) apnī beewī kī baat se raazī ho gae.⁽²⁾

Kannan kī zameen par das saal rahne ke baad Saarah ne apnī naukraanī Haajirā ko Ibraaheem^(a.s) kī dusrī beewī banaayā.⁽³⁾ Allaah taa’alā ke fazl se Haajirā haamilā hueñ, to unko apne upar bahut fakhr huā aur wo Saarah ko neechā dekhne lageñ.⁽⁴⁾ Tab Saarah ne Ibraaheem^(a.s) se kahā, “Āpkī wajah se mere saath burā suluk kiyā jā rahā hai. Maine apnī naukraanī ko āpko diyā aur wo jab haamilā ho gaī hai to mujhe neechā dekhne lagī hai. Allaah taa’alā hī faisla karne waalā hai ke ham donoñ me se kaun sahī hai.”⁽⁵⁾ Ibraaheem^(a.s) ne Saarah se kahā, “Wo tumhaarī naukraanī hai aur tum uske saath waisā suluk kar saktī ho jo tumheñ lagtā hai ke sabse acchā hai.” Saarah ne Haajirā ke saath itnā burā bartaaw kiyā ki wo unke paas se bhaag gaeñ.⁽⁶⁾

Allaah taa’alā ke farishte ne Haajirā ko dhuñdhā aur unko registaan me ek paanī ke jharne ke kinaare baitḥā paayā. Ye jharnā shahar Shur ko jaane waalī ek saḍak ke kinaare thā.⁽⁷⁾ Farishte ne puchā, “Haajirā, Saarah kī naukraanī, tum kahañ se ā rahī ho aur kahañ jā rahī ho?” Haajirā ne jawaab diyā, “Main apnī maalkin Saarah ke paas se bhaag kar ā rahī huñ.”⁽⁸⁾ Allaah taa’alā ke farishte ne kahā, “Tum apnī maalkin ke paas waapas jao aur uskā kahnā maano.”⁽⁹⁾

Tab Allaah taa’alā ke farishte ne Allaah taa’alā kā paigaam sunaayā, “Tum se pushten āge badḥengī aur itne log honge ki koī gin bhī nā sake.”⁽¹⁰⁾ Tab farishte ne kahā, “Tum ko ek betā paidā hogā jiskā naam Ismaaeel hogā, jiskā matlab hotā hai, ‘Allaah taa’alā ne sunā,’ kyunḱi Allaah taa’alā ne tumhaarī duā ko sun liyā hai.”⁽¹¹⁾ Ismaaeel registaan me ek āzaad jaanwar kī tarah bahut tez daudēgā. Wo apne bhaaeeyon ke mashrik me rahegā.”⁽¹²⁾

Haajirā ne Allaah taa’alā ke paigaam ko sunā aur kahā, “Allaah taa’alā wo hai jo hameñ dekhtā hai aur ab main usko samajh gaī huñ ki wo hameñ, har waqt dekhtā hai.”⁽¹³⁾ Usī jagah par ek kuañ thā jiskā naam unhone ‘Bair-Lahī-Roī’ rakhā, jiskā matlab thā, ‘Allaah taa’alā sab dekhne waalā hai.’ Wo kuañ shahar Kadesh aur Bareed ke beech me thā.⁽¹⁴⁾

Haajirā ne ek betē ko paidā kiyā aur unkā naam Ismaaeel rakhā gayā.⁽¹⁵⁾ Ismaaeel^(a.s) kī paidaaish ke waqt Ibraaheem^(a.s) kī umr chēyaasī saal thī.⁽¹⁶⁾